

Յունիս 21, 22, 23 — ընտրութիւններ Հայաստանի բոլոր վայրերում :
 Սորհրդարանի ընտրութիւնների համար ներկայացւեց թեկնածուների
 հինգ ցուցակ .

№ 1. Հ. Յ. Դաշնակցութիւն	120	թեկնածու
№ 2. Հայ Ժողովրդական կուս.	65	„
№ 3. Սոց.—Յեղափոխ. կուս.	35	„
№ 4. Բրդական ցանկ	2	„
№ 5. Ասորական ցանկ	3	„
№ 6. Անկուսակց. Գիւղաց. Միութիւն		
№ 7. Թրքական ցանկ		

Նախընտրական պայքարն արդէն սկսւած էր, երբ թիֆլիսցիների և երևանցիների միջև ծագած կուսակցական ներքին անհամաձայնութիւնների հետևանքով՝ Ժողովրդական Կուսակցութիւնը, թեկնածուների ցանկը ներկայացնելուց և ընտրական աշխատանքներին ձեռնարկելուց յետոյ, սնտախ պատրւակներով, հրաժարեց մասնակցելուց, յունիս 20-ին յետ պահանջեց իր ցուցակը և սկսեց պայքար մղել խորհրդարանական ընտրութիւնների դէմ : Այդ պայքարում նա յենուում էր, գլխաւորապէս, Պօղոս Նուպարի բռնած բացասական դիրքի վրա : Պօղոս Նուպարը դժգոհ էր, որ Հայաստանում խորհրդարանական ընտրութիւններ էին կատարուում . Հայաստանը նրա աչքին մի գաւառ էր սոսկ, ուր կարող էր գոյութիւն ունենալ տեղական իշխանութիւն և ոչ թէ խորհրդարան :

Նախընտրական պայքարը եղաւ բաւական տաք . ժողովներ, թուցիկներ, ընտրական ցուցատախտակներ, կոչեր, անհաշիւ յօդւածներ թերթերում : Կուսակցական գործիչները պատում էին դիւղից դիւղ ու քաղաքից քաղաք և աշխատում ժողովրդականացնել իրենց թեկնածուների ցանկը — ճիշտ և ճիշտ Եւրոպայի օրինակով :

Ամենից լայն ժողովրդականութիւն վայելողը, բնականաբար, Հ. Յ. Դաշնակցութեան ցանկն էր և նրա նշանախօսքերը . Հ. Յ. Դաշնակցութիւնը պահանջում էր «Միացեալ և Անկախ Հայաստան», «Ամբողջ իշխանութիւնը աշխատաւոր ժողովրդին», «Հողը աշխատաւորին», «Գործ՝ գործազուրկին», «Հաց ժողովրդին», «Ժողովուրդների համերաշխութիւն և եղբայրութիւն» :

Ընտրութիւնները տեղի ունեցան նշանակւած ժամանակին և արդիւնքը եղաւ .

Հ. Յ. Դաշնակցութիւնը ստացաւ	230,272 քւէ	— 72 պատգամաւոր
Սոց.—յեղափոխականները՝	13,239 քւէ	— 4 „
Թուրքերը՝	8,187 քւէ	— 3 „
Անկուսակց. Գիւղաց. Միութիւնը՝	4,224 քւէ	— 1 „
Բրդական ցուցակը՝	1,305 քւէ	— ո՛չ մէկ
Ժողովրդականները՝	481 քւէ	— ո՛չ մէկ
Ասորիները՝	178 քւէ	— ո՛չ մէկ